

गडचिरोली क्रांतिकारी आंदोलन ता नेत्री,
कामरेड सृजना ना शहादत तुन तेहचि पोयकाल!



कामरेड सृजना ना आदर्शकुना हरदे ताकसोरे
क्रांतिकारी आंदोलन लोपा दृढता ते मुन्ने
दायकाल!!

काँमरेड सृजना क्रांतिकारी पिस्वलः-

- ★ 1988 अप्रैल ते भामरागढ दलते भर्ती आसि चिनक्का पोरोय ते काम कीता.
- ★ 1988 जुलाई तल 1991 अगस्त हेवनल पेरमिली दलम लोपा सदस्या रूपते काम कीता.
- ★ 1990 मार्च ते पार्टी सदस्य बनेमाता.
- ★ 1991 जनवरी ते मर्मि आता.
- ★ 1991 अगस्त तल 1995 मार्च हेवनल टिप्रागढ दल काम कीता.
- ★ 1995 मार्च तल 1997 नवंबर हेवनल दंडकारण्य ता पहली प्लाटुन ते काम कीता.
- ★ 1996 नवंबर ते प्लाटुन पार्टी कमेटी (एरिया कमेटी) सदस्य बनेमाता.
- ★ 1998 नवंबर तल 2002 हेवनल एटापल्ली दलते डिप्युटि कमांडर काम कीता.
- ★ 2002-एटापल्ली दलम तुक कमांडर आता.
- ★ 2004- डिवीजनल कमेटी सदस्य बनेमाता.
- ★ 2004 तल 2007 हेवनल एरिया कमेटी सचिव आणि प्रभारी डीवीसीएम बनेमाता.
- ★ 2009 दिसंबर ते टिप्रागढ तुक बदली आसी एसी तुक प्रभारी डीवीसीएम बनेमाता.
- ★ 2010 तल 2014 अक्टोबर हेवनल टिप्रागढ प्रभारी डीवीसीएम काम कीता.
- ★ 2009-रीजनल कमेटी सदस्य बनेमासि 2013 हेवनल काम कीता.
- ★ 2013 मार्च तल 2015 अक्टोबर हेवनल पश्चिम सब जोन युनिफाईड कमांड सदस्य बनेमाता.
- ★ 2014 तल 2020 मई हेवनल कसनसूर एरिया प्रभारी डीवीसीएम रूपते काम कीता. काँमरेड रजिता ना शहादत ता पया 6 महिनांग (2016 अप्रैल तल 2017 जनवरी हेवनल) कसनसूर एसी तुक सचिव बनेमाता.
- ★ 2017 ते कसनसूर, चामुर्सी रेंड एरियांगना प्रभारी बनेमाता. 2018 ते चामुर्सी दलम तुन अलगे ताकी कियापरवा स्थिति ते रेंड दलकुन मिला कीसि उंदि ए.सी कीता पया ताना प्रभारी डीवीसीएम बनेमाता.
- ★ 2019 अक्टोबर तल कसनसूर एसी सचिव अणि प्रभारी डीवीसीएम काम कीता.
- ★ 2020 मई 2 ता दिया कसनसूर एरिया सीनबटटी ते पोलिस तारिन प्रतिरोध कीसोरे शहीद आता.

गड़चिरोली क्रांतिकारी आंदोलन ता नेत्री, कामरेड सृजना ना शहादत तुन तेहचि पोयकाल! कामरेड सृजना ना आदर्शकुना हरदे ताकसोरे क्रांतिकारी आंदोलन लोपा दृढता ते मुन्ने दायकाल!!

2 मई 2020 ता दिया गड़चिरोली क्रांतिकारी आंदोलन ता इतिहास लोपा उत्पीडित जनमुक्ति, अणि महिला मुक्ति आंदोलन ता हरदे वेल्ला दुःखमता दिया आंदु. इद दिया उत्तर गड़चिरोली डिवीजनल कमेटी सदस्या कामरेड सृजना एटापल्लि तहसील पेंड्री पुलिस स्टेशन अंतर्गत सीनबट्टी हेरे सी-60 कंमाडो बल संगे हिम्मत अणि साहस ता संगे लडेमासोरे तन्ना संगे मत्ता कामरेड्स किन बचा कीसोरे वीर योद्धा बनेमासि शहीद आत्ता. ताना शहादत नगडकु भारत ता नवजनवादी क्रांति उंदि वरिष्ठ महिला साथी कुन नुकसान अत्ता. दण्डकारण्य ता जनआंदोलन तल भर्ती आसि मत्ता भूम मियाड तुन नुकसान आत्तोम. 40 सालकुना गड़चिरोली क्रांतिकारी आंदोलन 32 सालकना लंबा अनुभव मत्ता आरसी स्तर ता नेतृत्वकारी कामरेड किन नुकसान आत्तोम. जनताना, कैडर कुना अपार विश्वास तुन हासिल कीत्ता पहली पीडि ता महिला कामरेड किन नुकसान अत्तोम.

पश्चिम सबजोन आंदोलन ता इतिहास लोपा उंदि अध्याय तुक चिन्ह आसि मत्ता जीवता कॉमरेडकुन नुकसान आत्तोम. अद कामरेड ना स्मृति ते पश्चिम सबजोनल ब्यूरो विनप्रता ते ओडस तला कीसि क्रांतिकारी जोहार वेहसोर मंता. तना अधूरा आशय किन आखरी एवना मुन्ने ओयकोम इंजि किरिया कीसोर मंता.

अत्ता 32 सालकुनल गड़चिरोली क्रांतिकारी आंदोलन किन मुन्ने ओयला साटि कामरेड सृजना कीत्ता योगदान अविस्मरणीय आंदु. गड़चिरोली आंदोलन ता निर्माण लोपा अणि आंदोलन ता हर उतर-चढ़ाव लोपा ओसो हर मोड़ ते ताना भूमिका जोडेमासि मंता. क्रांतिकारी आंदोलन लोपा ताना योगदान तुक वेल्ला महत्व मंता. वेल्ला समय तल क्रांतिकारी आंदोलन तुन मुन्ने ओयला साटि अद कीत्ता काम तुन पुंदकाल. तना आदर्शकुना हरदे ताककाल!

कामरेड जैनी, आरके ना पिस्वल ता शुरूआत

50 सालकुना मुन्ने भामरागढ़ तहसील ते गोपानार नाटे आरके परिवार लोपा एलाड मुवूर नडमा पुटता पिला आंदु. तानकु यायो-बाबो जैनी पेद्दीर तास्तोर.तना बाबो ना पोरोय चैतु आरके, यायो सुकरीबाई आरके अणि वरोर दादाल ओसो एलो मंतोर. सबे आदिवासी पिल्लांग लेहकाने जैनी आरके वेन्ने बुद्धि पुतगडल लोता काम कमाई ता काम, ओसो वनोत्पादन पेहकीसि तत्ताना लोपा वेल्ला मेहनत कीदू. सीजन हिसाब ते तुमीर आकी कोयना, वेदुर नडकना कूली कबड ते वेन्ने शामिल आंदु. आरके परिवार तुक परियाप्त भूमि मतांकु पूरा लोतोर मेहनत कीसि कमाई ता काम कीसोरे मत्तांकु मध्यम स्तर ते पिस्सीदुर.

1980 ता दशक ते नाहकुनगा जनताना पोरो आदिवासी सियान लोरा दबाव, जबरदस्ती वेल्ला ताकींदु. महिला ना पोरो आदिवासी कबिलाई ता पितृसत्ता दमन वेन्ने वेल्ला मंदू. अद समय ते 1980 ता नडमा सिरोंचा तल क्रांतिकारी आंदोलन गड़चिरोली एवसि 1984 एवनके भामरागढ़, जारवंडी एवनल फैलेमत्ता. 1984 फरवरी ते भामरागढ़ दल बनेमासि भामरागढ़, गट्टा एरियांग लोपा क्रांतिकारी आंदोलन तुन पंडला कोशिश शुरू कीत्ता.

जंगल इलाकांग लोपा वनविभाग, आबकारी, राजस्व विभागकुना लूटी, उत्पीडन, शोषण ता विरोध ओसो सामंती, दलाल बांडवालदार ओसो साम्राज्यवादीरा लूट अणि शोषण ता विरोध ते जनता किन एकता कीसोरे राजनीतिक, सांगठनिक आंदोलन शुरू अत्ता. क्रांतिकारी पाटांग ओसो पोल्लोंग वेहसोरे कीत्ता प्रचार वन विभाग अणि तुमीर आकी टेकेदार लोरा विरोध ते कीत्ता संघर्षकुनल मावा दल कुन जनता जीवा कीयलातोर. अद्रमासि जनता आदिवासी सियानलोरा दबाव अणि दमन ओसो महिलाना पोरो आदिवासी कबिलाई ता पितृसत्ता ता शोषण ओसो दमन बारे ते दलकुना संगे वेहची अगडल मुक्ति आयना इंजि चर्चा कींदुर अद्रमता राजनीतिक महौल सृजना अणि तना परिवार तुन आंदोलन तुक एरे कीसि हिता.

आदिवासी कबिलाई पितृसत्ता पोरो पितृरी तेहता चीनक्का :

चैतु आरके परिवार वेल्ला मेहनत कीसि बेस पिस्सना तुन विरोध कीसोर मत्ता गोपानार नाटेना सियान लोर चैतु ना परिवार पोरो ओदे पंडितोर इंजि आरोप कीत्तोर. अद समस्या तुन चैतु दलतोरकुन वेहतास्के इद्रम ता गलत आरोप किन टुंडी कीसि नाटेनोरीन खटला कियनायो इंजि सियान लोरकिन दल चेतावनी हिता. अगडल दलतोरिन चैतुना परिवार वेल्ला जीवा कीयना बेरस्ता. मावा दलतोर जनताना समस्यांग पोरो संघर्ष कीयनेके गोपानार नाटेना लय्या-लयोर दल लोपा भर्ती आयला तैयार आत्तोर. जैनी वेन्ने दलम ते भर्ती आयला गिर्दा अत्तास्के यायो-बाबो तमा पुटुल तोरकुन हीसि ताना मर्मी कित्तोर. मति विचार लेवा मर्मी तुन अदु विरोध कीसि तना यायो-बाबोन वेन्ने विरोध कीसि मामालोरा लोतल पेसीस जीवा तोरगा हंजी पिस्सलाता. मति तनाकिन विचार लेवा मर्मी कीसित्तांकु जीवा सगातोरगा मत्ता जैनी

किन ओसो तच्ची तमा मामालोर किन सौंपे कीयला यायो-बाबो ओसो नाटेना सियान लोर कित्ता कोशिशकुनल जैनी आदिवासी कबिलाईना पितृसत्ता ता शोषण तुन समझेमत्ता. मावा दलकु हेवा मुन्ने विचार लेवा मर्मी कित्ताकु उचुक लेय्यास्कु नारज तेने कोयतोरकु अत्तेकाई तमा स्वेच्छा, स्वतंत्रता ओसो अस्मिता तुन पोयसि मत्ता उचुक लय्यास्कु कुदखुशी वेन्ने कीत्ताद मंता. मति गिर्दा लेवा कोयतोनकु अन्नोन आत्महत्या कियना सही हरी अयो समझेमात्ता कामरेड जैनी गेरिल्ला दल लोपा शामिल आयला विचार कित्ता. अद्रमासि विचार लेवा मर्मी कीत्ता यायो-बाबो ओसो आतो-मामा, सियानलोरिन विरोध कीसि पितृसत्ता पोरो पीतुरी झंडा तेहसी 1988 अप्रैल ते जैनी दल लोपा भर्ती आसि चन्नाक्का बनेमत्ता. स्वेच्छा, स्वतंत्रता, अस्मिता तुन गिर्दा आसोरे मत्ता आदिवासी लेय्यास्कुन लडाई हरी तोहतना लडाई झण्डा बनेमत्ता.

दृढता अणि विश्वासनीय रूप ते काम कीत्ता सक्षम संगठक:

कामरेड सृजना एरिया कमेटी सदस्या रूप ते 1996 नवंबर ते विकास आतगडल 2020 मई एवल 28 सालकु एरिया कमेटी, डिवीजनल कमेटी सदस्या रूप ते वेल्ला दियांग जनता किन क्रांतिकारी आंदोलन लोपा एकता कीसोरे जननिर्माणकुना लोप, स्थानीय निर्माणकु लोपा संगठित कीत्ता.

हर साल तुमिर आकींग कोयना, वेदुर नडकना कबस्कुना मजदूरी रेटकु बेरसी कियला जनता किन एकता कीसि संघर्ष किया वेहता. नाहकुना जनविरोधी सियानलोर विरोध ते जनता किन एकता कीसि संघर्षकु किया वेहता. जनता किन क्रांतिकारी राजनीति संगे चेतनाबद्ध कीसोरे ओरिन जन संगठनकु, जनमिलिशिया, पार्टी सेल, ग्राम पार्टी कमेटी (जीपीसी) अणि जनता ना सरकारकु लोपा संगठित कीत्ता. दुश्मन ना हमलांग लोपा देब्बा तित्ता जन निर्माणकुन दोगवा लेवा बार-बार पुनरनिर्माण कीत्ता.

2001 ते जरगता मावा पार्टी ता कांग्रेस एवसी कीत्ता मार्गदर्शन तुन पोयसि शुरू अत्ता क्रांतिकारी जन कमेटींग (आरपीसी) पंडना काम लोपा कामरेड सृजना पहल कदमी अणि संकल्पबद्ध आसि मंजी काम कीत्ता. एरिया कमेटी सचिव अणि जरूरत अनुसार दल कमांडर ता जिम्मेदारींग वेन्ने पोयसि मंजि अद बेस गिर्दा ते जनताना सरकारकुना निर्माण काम लोपा शामिल अत्ता. गडचिरोली ते मत्ता देश काल परिस्थितिंगना पोरो आधारसि ए.आर.पी.सी. (एरिया जनताना सरकार) पंडना इंजि एसजेडसी हित्ता मार्गदर्शन ता वेची ते कसनसूर ए.आर.पी.सी तुन पंडसी काम किया वेहतना लोपा सृजना महत्वपूर्ण भूमिका निभा कीत्ता. टिप्रागढ़ ए.आर.पी.सी तुन काम किया वेहतना लोपा वेन्ने सृजना महत्वपूर्ण काम कीत्ता. एरिया सरकार कुन अविना सुरक्षा ते जनमिलिशिया तुन, सेकंडरी फोर्स तुन समन्वय कीसोरे जनताना खास्तकारी विकास तुक वेल्ला प्रयास कीत्ता.

वेल्ला सालकुनल मासवर्क कीसोरे अनुभव हासिल कीत्तेकाई अद बस्केने तन कीत्ता प्रयासना बारे ते बेकेने पोंगडिंगे वेहो. जनताना सरकारकुना निर्माण कियना मौका ते, बाकी राजनीतिक विषयकुना बारे ते तन पुनवाविन पुन्नोन इंजि स्पष्ट रूप तेने वेहचि अविना बारेते पुत्ता कामरेडसकु नगडल, पोरो कमेटी कामरेडसकु नगडल पुंदला कोशिश कींदु. पुनवाविन वेन्ने पुतन इंदना लेक्का वेहो. तन बचोन काम कीत्तेके अचोन कमेटी तुक रिपोर्ट हींदू. पुन्ववु पुंदला कोशिश कीत्ता. इद्रम अद पार्टी तुक उंदि विश्वासनीय संगठक रूप ते मत्ता.

लगातार ताकसोर मत्ता दुश्मन ना हमलांगना नडमा झूठी मुठभेडकुना लोपा दुश्मन स्थानीय निर्माणकुना कामरेडस किन हौवकना, गिरफ्तार कीसि यातनांग हीसोरे जनताना लोपा, स्थानीय निर्माणकुना लोपा दहशत पुटिट कीत्तास्के पूना निर्माणकु कियना इत्तेकाय, अविन पुनर निर्माण कियना इत्तेकाय अविना मीटिंग कीसि समन्वय कीसोरे कबड किया वेहतना वेल्ला तिप्पाल लेक्का मत्ता. अद्रमता स्थिति ते जननिर्माणकुन पंडसोरे, पुनरनिर्माण कीसोरे अविन काम किया वेहतनदु कामरेड सृजना सक्षमता तुक संकेत आंदू.

पुलिसतौरा कारपेट सुरक्षा फैलेमासि, मजबूत आसोर मत्ता स्थिति ते भूमिगत अणि गैर कानूनी निर्माणकुने सीमित आसि मत्तेके व्यापक जनता किन क्रांतिकारी आंदोलन लोपा एकता किया परोम इंदना विचार ते एसजेडसी हीत्ता मार्गदर्शन लोपा गडचिरोली ते 2013-14 तल कानूनी अणि आलूजूरी संगठन कुन निर्माण कियना प्रयास शुरू अत्ता. उंदि बगिल भूमिगत अणि गैर कानूनी संगठनकुन निल्पी कीसोरे दूसरी बगिल कानूनी मंचकु बना कियनदु ताकता. कसनसूर एरिया ते बचोको नाहकुने सृजना कानूनी संगठनकुन निर्माण कीसि संचालन कीत्ता. कारपेट सुरक्षा नडमा जनता किन क्रांतिकारी आंदोलन लोपा एकता कीसोरे ओरा संगे ओसो स्थानीय निर्माणकुना संगे जैविक संबंध मंदना लेक्का ओरकु मार्गदर्शन हियला स्थानीय पार्टी सदस्यकुनल उयतूरिन पूर्णकालीन कार्यकर्ता रूपते सृजना तैयार कीत्ता. तन काम कीत्ता कसनसूर, टिप्रागढ़ एरियांग लोपा पार्टी अणि पीएलजीए तेके वेल्लातोरिन भर्ती कीत्ता दान लोपा सृजना ना भूमिका मुख्यतद आंदू.

हामरतुक वेरियवा मत्ता साहसिक गुरिल्ला :

कामरेड सृजना ना क्रांतिकारी पिस्वल हमेशा दुश्मन ना हमलांगना नडमा मंजि अविन सामना कीसोरे, प्रतिरोध कीसोरे ताकता. 32 सालकुना ताना लडाई पिस्वल ते दुश्मन ना फायरिंगकु, मुठभेडकु हिलवा मत्ता सालकु वेल्ला कम मंतांग. 1997 तुक मुन्ने तन दलम पोरो ओसो तना मत्ता बलकुना पोरो सरासर 2 साल कुने उंदि फायरिंग आसि मत्तेके 1997 तल अत्ता 23 सालकुनल सरासर साल तुक उंदि फायरिंग आसोरे बेस्के-बस्के साल तुक 2-3 फायरिंग नेन्ने अत्तांग.

1989 ते गट्टा रेंज ते आलेंगा तेके अत्ता फायरिंग तन सामना कीत्ता पहला फायरिंग आंदूंग. 1992 जून ते टिप्रागढ एरिया ता कोवेडोह ते, गट्टानेली ते, 1993 जुलाई ते सिंदेसूर ते, 1994 ते गुरेकस्सा ते ओसो चकरीघाट ते अद्रमे मुरुगांव रेंज ता नाटे फायरिंग अत्तांग. 1995 ते पेरिमिली रेंज ता तुमरीकस्सा ते फायरिंग अत्ता. 1996 ते प्लाटून संगे प्रतिरोध कियला उत्तर बस्तर अत्तास्के अगा वेन्ने प्लाटून पोर्रो फायरिंग अत्ता.

1998 तल 2020 मई एवना उडतेके 1998 ते पोटावी जेवेली, तामड़ा, चंदनवेल्ली, गढदेवाडा ओसो गजमेडी, बोटेझरी, आंबेझरी अद्रमे उडला जलिया तेके जरगता फायरिंग कुना लोपा कामरेड सृजना शामिल मत्ता. ओसो चामूसी एरिया ता तांडवाय, सुरजागढ ता नेंडवाडी, कसनसूर एरिया ता कचलेर, वेडमागढ फायरिंगकुना लोपा वेन्ने शामिलासि मत्ता. 2004 ते पैडिटोला ते, 2005 ते मनेवारा ते जरगता फायरिंग लोपा वेन्ने मत्ता. 2013 अप्रैल ते जरगता सिंदेसूर फायरिंग ओसो 2014 ते कसनसूर एरिया डीएकेएमएस अधिवेशन पोर्रो जरगता फायरिंग ता पया 2015 नवंबर ते नवेगांव ते, 2016 मार्च कारकाटोला ते, जून ते तोका जेवेली ते, 2017 ते रेकानार ते 2018 फरवरी ते गोठनकरका, मई ते इरपगुट्टा, जुलाई ते पिपिलबूरगी ते जरगता फायरिंग कुने मत्ता. अद्रमे वेडमपल्लि फायरिंग ते वेन्ने मत्ता. 2019 ते कुंडुम ते, जुलैते काडसी ते जरगता फायरिंग कुना लोपा वेन्ने मत्ता. अद्रमे 2020 मार्च ते गंगिनी ते, मई ते सिनबट्टी ते ताना पोर्रो फायरिंग अत्ताद मंता. इद्रम कामरेड सृजना 30 तुक पोर्रोने फायरिंग ना लोपा शामिलासि मत्तेके ओसो उचुके घटनांग नगडल जनताना मदत ते ओसो तमा सतर्कता ते बसकीसि बचेमासि मत्ता. मति आखरी तुक 2 मई 2020 ता दिया वरोर गद्दारी हिता समाचार तुन पोयसि वात्ता पुलिसतोर सिनबट्टी ते कीत्ता फायरिंग लोपा तना दल ता सदस्यलोरिन बचा कियला आत्म बलिदान तुक तैयारासि दुश्मन किन हिम्मत ते प्रतिरोध कीसोरे कामरेड सृजना शहीद आत्ता.

1991-94 नडमा ता समय गडचिरोली क्रांतिकारी आंदोलनता इतिहास लोपा वेल्ला कठिन ता समय आंदू अदु महाराष्ट्र सरकार गडचिरोली क्रांतिकारी आंदोलन तुन मारी कियला विशेष योजना तुन बना कीसि लागू कीत्ता समय आंदू स्थानीय निर्माण कुनगडल शुरू कीसि पार्टी, गेरिल्ला बलकुना सदस्यलोरिन ठोस रूप ते चीनेमासि वरोन-वरोन चुने कीसि हौकना लक्ष्य ते दुश्मन पहचान कियना, अलग कियना, मारी कियना पोर्रोय ते (आयडेंटिफिकेशन, आयसोलेशन, लिक्विडेशन) मूण्ड रीतिंगना योजना तुन बना कीत्ता. अद समय ते गडचिरोली, भंडारा जिलांग लोपा पुलिस तोर लग-भग दो-तीन हजार जनता किन, स्थानीय निर्माण तोरिन गलत रूप ते आरेस्ट कीसि फासीवादी टाडा (TADA) कानून तहात जेलकुने वाटतोर. इव रेण्ड जिलांग लोपा लगभग 60-70 जन किन झूठी मुठभेड कुने हौक्तोर. उचवुरिन गायब कित्तोर. तीनकुन मुन्ने वेन्ने गडचिरोली आंदोलन तुन दबा कियला साटि दुश्मन तीव्र दमन तुन ताकीसि मत्तेकाय 1991-94 ता हमला अविनकाय ज्यादा गंभीर रूप ते ताकता विशेष हमलांग आंदू. अद हमला तुन उडसी टिप्रागढ दल कमांडर रामलाल सहित उयतूर दल सदस्यलोर वित्ततोर. जनताना लोपा ओसो स्थानीय निर्माणकुना लोपा वेल्ला दहशत बनेमत्ता. दुश्मन ना हमला तल चुकली तोर बनेमात्तोर. जनविरोधीलोर पार्टी विरोधी कार्यक्रम कुन तेज कित्तोर. इद्रमता परिस्थिति लोपा जनता मावा पार्टी ता मुन्ने कई सवाल कुन निलपी कित्तोर. संगठन लोपा काम कियनीकी आयवा लेवा कम से कम संघर्ष कमेटींग लोपा मंदनीक वेन्ने तैयार हिल्ला मत्तोर. संगठन ते काम कीयमूड इत्तेके दुश्मन हमला लोपा जीवा पोहतानीक वेन्ने तैयार मंदना परिस्थिति मत्ता. इद्रम ता परिस्थिति लोपा जनता तुन ओसो स्थानीय निर्माण तोरिन राजनीतिक रूप ते चेतनाबद्ध कियनादु, चुकली तोरिन ओसो जनविरोधी लोरिन दबा कियनादु, पार्टी अणि गेरिल्ला दल किन बचा कियला गेरिल्ला युद्ध नियम कुन कडक ते लागू कियनाद इंजोरे विशेष योजना तुन पोयसि अस्के मावा पार्टी काम कीत्ता.

पढाई बाता लेवा आदिवासीरिन पोयसि लडेमातेके बाता फायदा मंता? स्कूल करियतोररिन पोयसि लडेमात्तेके बेस, जंगल लोपा मंजि लडाई कीत्तेके बाता फायदा? बंबाई लेहकटा शहरकुनगा लडाई कीत्तेके बेस, पुलिस तोरा खिलाफ लडाई कियना इंजोरे वेहसोरे पुलिसतोर वात्तेके बारामीटु बारांक बुस्कीतीर, तुपाईंग पोयसि लडाई कियनाद आयवा लेवा चुनाव कुना लोपा नितेके बेस आयर बहे! रामलाल वित्ततोर मीट वेन्ने वित्तिंतीर बहे! इंजोरे लेवा-लेवा प्रश्नांग जनता दुश्मन ना हमला तेज अत्ता पया पार्टी मुन्ने तास्तोर. इव सबे मावा राजनीतिक, सैनिक लाईन ता संबंधित प्रश्नांग आंदू. इत्तेके वर्ग संघर्ष लोपा प्रधान रूप ते किसान आणि आदिवासी लोरा पोर्रो आधार आयनादा लेवेके छात्रलोरा पोर्रोया? जंगल, मेट्टांग मत्ता रणनीतिक इलाकांग नगडल जनयुद्ध तुन शुरू कियनादा, शहरकुनगडला? चुनाव कुना हरदे दायनादा? जनुयद्ध ता मार्ग पोयनादा? पुलिसतोरिन सामना कियनादु गेरिल्ला युद्ध संगेना लेवेके आमने-सामने नित्तीसि मंजि युद्ध कियनादा इंदनादे जनताना सवालकुना सार आंदू. ताना साटि मावा राजनीति सैनिक दिशा (रणनीति-कार्यनीति) तुन जनता समझेमायना भाषा ते सरल रूप ते ओरकिन मझा कीसारे दो सालकु उंदि राजनीतिक अभियान तुन ताकी कित्तोम. चुकली नेटवर्क तुन कंट्रोल कियला साटि दो महीना विशेष कार्यक्रम तुन पोयतोम. मावा बलकुना रक्षा साटि मावा ताकनादु, डेरा वाटनादु, सामान तत्ताना विषय कुना लोपा गोपनीयता, स्पीड, दृढसंकल्प, हमेशा सतर्कता, लेकडा गेरिल्ला युद्ध नियम कुन विशेष ध्यान हीसि लागू कित्तोम.

नाहकुना वरोन-वरोन तैयार कीसोरे मुवूर तैयार अत्ता जागा ते भूमिगत संगठन तुन पंडसोरे ओरगडल चुनाव कीसि पार्टी सदस्यता हियना कार्यक्रम एतता मंता. दूसरी बगिल पुलिस बलकुना पोर्रो भीमानकोजी लेकटा एंबुशकु शुरू कित्तोम. इत्तेके अद समय ता दुश्मना ना दमन तुन प्रतिरोध कियला माटु विशेष रूप ते राजनीतिक, सैनिक, सांगठनिक

प्रयास तुन ताकी कित्तोम. इद पूरा प्रयास लोपा कामरेड सृजना सक्रिय रूप ते अणि हिम्मत ते मंजि वेल्ला मेहनत ता काम कीसोरे शामिल आत्ता. रामलाल लेक्काटोर वित्तिस मत्तेकाई इदमता राजनीतिक, सैनिक अणि सांगठनिक काम कीसोरे शोषित जनताना साटि पार्टी लडेमांता इंदना विश्वास तुन जनताना लोपा निल्पी कित्तोम. अद समय ता प्रयास नगडल भूमिगत जन संगठनकुना निर्माण अणि भूमिगत पार्टी निर्माण ओसो स्थानीय निर्माण कुन मावा राजनीतिक, सैनिक दिशा पोरो सचेतन कियना, मुखबिर लोरिन कंट्रोल कियना, रोजमर्ग पिस्वल लोपा, युद्ध कार्रवाईंग लोपा गेरिल्ला युद्ध नियमकुन पालन कियनादु. बेद्रम ताकिंता इंदना विषय तुन ठोस अनुभव ता संगे कामरेड सृजना करियता. अद्रमता अनुभवकुना संगे बस्केटा-अस्के पार्टी एवसि कीत्ता राजनीतिक, सैनिक प्रशिक्षण संगे जनयुद्ध तुक नेतृत्व कीसोरे ताकी कीसोर मत्ता. आंदोलन तल हासिल कीत्ता अनुभव तल अद तना राजनीतिक, सांगठनिक, सैनिक स्तर तुन बेरसी कीसोरे विकास अत्ता.

पुलिस मुखबीर लोरिन अलग-अलग रीतिने कंट्रोल कीसोरे जरूरत अनुसार उयतुरिन ख्म कीत्ता घटनांग लोपा सृजना शामिल अत्ता, कमांडिंग कीत्ता. क्रांतिकारी आंदोलन पोरो दमन तुन ताकी कीसोरे मत्ता पुलिस हमलांग कुन प्रतिरोध कियला साटि पार्टी पोयता प्रतिरोधात्मक कार्रवाईंग लोपा, टीसीओसी लोपा कामरेड सृजना प्रत्यक्ष अणि परोक्ष रूप ते शामिल अत्ता. उचुक घटनांग लोपा सदस्य रूप ते बाकी घटनांग लोपा सेक्शन डिप्युटी, सेक्शन कमांडर अणि प्लाटुन डिप्युटी रूप ते शामिल अत्ता. भीमनकोजी (1992), मेडपल्ली (1995), बंजारीघाट (1996), रडनपल्ली-चलेवाडा (1997), नेडवाडी खंडी (1997), रोप्पी, कोताकोंडा-गोडसर (1998), चातगांव-गट्टा (2006 जून), पूलबोडी-पूसटोला, गट्टा जंमडीजोरा एंबुशकुना लोपा कामरेड सृजना शामिल अत्ता. अद्रमे 2010 ते हातिगोटा ते 16 टन विस्फोटक जब्त कीत्ता घटना लोपा वेन्ने शामिल अत्ता. 2001 तल हर साल ताकी कीत्ता टीसीओसी लोपा कामरेड सृजना कमांडता, मेंबर आसि मंजि दुश्मनना समाचार एतना ओसो रेक्की, प्लानिंग लोपा शामिल आसि टीसीओसी सफलता तुक वेल्ला कोशिश कीत्ता.

सृजना क्रांतिकारी पिस्वल लोपा कई पुलिस फायरिंग कुन सामना कीत्तेकाय, बचोको हमलांग नगडल बाल-बाल बचेमासि मत्ता कामरेड सृजना बस्केने दुश्मनना हमलांग ओसो आमुर तुक वेरियो. कारपेट सुरक्षा फैलेमासि इनफार्मर लोरा समस्या वीडिसी बेद-बेद साल ते दो-तीन फायरिंगकु आसोरे ओसो दो-तीन फायरिंग नल बचेमासोरे मत्ता परिस्थितिंग लोपा 2017 तल तना जीवन साथी ना संगे कलियसि 'ओसो अलग आयना समय ते ओसो कलियीतोमो, कलियोमो इंजोरे' संविधाय उद्धेवपूर्ण रूपते वेहिंदु, मति एरिया तुक अंजि जनताना लोपा काम कियनीक बेस्केने पेरके गुचो. एरिया ते काम कियना समय ते पुलिस फायरिंगकु तपो इंजोरे, अविना लोपा बेस्केनो उंदि बेरा जीवा तुन पोहमूड आयार इंजि मत्ता स्पष्टता संगेने कामरेड सृजना जनताना लोपा काम कीसोरे आमुर तुक वेरियवालेवा मंदना साहसिक गेरिल्ला रूप ते शहीद अत्ता.

क्रांतिकारी राजनीतिंग वेहता गुरुजी :

सुडलस्के स्कूल पढाई तुन पुनवा मत्ता कामरेड जैनी लड़ाई लोपाने प्राथमिक शिक्षा तुन करियसी पार्टी पत्रिकांग, सर्कूलरकु ओसो दस्तावेजकु पढेमासि समझेमासोरे जन निर्माणकुने मत्तोरकिन वेहतला वेल्ला गिर्दा तोहिंदु. दूसरी बगिल ग्रामीण इलाका लोपा पढेमात्ता नवजवान लोरिन जननिर्माणकुना लोपा संगठित कीस मत्तेके ओरकिन तमा-तमा तबकांग ना सामाजिक समस्यांग पोरो क्रांतिकारी राजनीतिक कुन लागु कीसोरे राजनीतिंग वेहतला पूना-पूना रीतिने कोशिश कीत्ता. तन पुनवा विषयकुन साथी कामरेड्स नगडल करियला अद्रमे ओरा संगेने अव कबसकुन किया वेहचोरे सबेटोरा मदत एतिसी आंदोलनता जरूरत कुन पूरा कियना लोपा कामरेड सृजना पूना हरिंग पंडता. दूसरी बगिल पार्टी शुरु कीत्ता नेतृत्व प्रशिक्षण कोर्स लोपा शामिल आसोरे तना सैद्धांतिक, राजनीतिक ज्ञान तुन बेरसी कीत्ता. तना दीर्घकालिन ता क्रांतिकारी आचारण, अनुभव संगे अद्रमे पार्टी नगडल दोरकता सैद्धांतिक, राजनीतिक, सांगठनिक, सैनिक प्रशिक्षण संगे तना स्तर तुन बेरसी कीसोरे तन प्रभारी जिम्मेदारी ते मत्ता एरिया ता पार्टी, पीएलजीए कैडर लोरकिन, बलतोरकिन तने गुरुजी हिसाब ते कई विषयकुना पोरो राजनीतिक कक्षांग ताकि कीत्ता.

पितृसत्ता विरोध संघर्ष ते :

कामरेड सृजना पितृसत्ता विरोधी संघर्ष ते मुन्ने मंदू, अद बद तरीका ते सामने वातेकाई पुरुष अधिपत्यतुन खंडन कीसोरे स्त्री-पुरुष समानता साटि लडेमांदू. पूरा दण्डकारण्य ते मत्ता सीनियर महिला कामरेड्स किन जमा कीसि पार्टी ताकी कीत्ता विशेष बैठकींग लोपा खुशी ते शामिल आंदु. अद्रमे डिवीजन ते, सबजोन ते संचालित कीत्ता महिला विशेष बैठकींग लोपा वेल्ला बेरा शामिल आत्ता. 2017 ते जरगता रेण्डु सबजोन (उत्तर, पश्चिम) कुना विशेष महिला बैठक ते शामिल आसिवासी 2018 ते डिवीजन ते ताकी कीत्ता विशेष महिला बैठक लोपा रूस अणि चीन ता क्रांतिकारी महिलांग ना अनुभव किन क्लास रूप ते वेहता. आदिवासी समाज लोपा महिला सामना कीसोरे मत्ता समस्यांग अणि अविन सुदृढ कियना लोपा अडम वासोरे मत्ता पितृसत्ता खटलांग किन ओसो अद्रमे क्रांतिकारी आंदोलन लोपा साथी महिला कामरेड्स सामना कीसोरे मत्ता समस्यांगकिन कोल ते, तना अनुभव तल समग्र रूप ते समझेमायला अद वेल्ला कोशिश कीत्ता. अद्रमे अद अचोक समय दण्डकारण्य महिला सब-कमेटी ता सदस्या आसि मंजि महिला समस्या किन हल कियला सामूहिक चर्चांग लोपा भाग एतसी हरिंग परकसी आचरण ते मार्गदर्शन हीत्ता. आंदोलनरत महिलांग किन उंदि सीनियर महिला रूप ते मदत हीसोरे अविंकु लड़ाई लोपा वासोर मत्ता समस्यांगना पोरो सही राजनीतिक समझदारी हीसोरे

महिलांगना समस्यांग वेन्ने सामाजिक समस्यांगे इंजोरे, समाज लोपा लूटी, शोषण, दमन असमानतांग रद्ध कियला लडेमासोरे महिला मुक्तिना हरीं तुन पंडना इंजोरे वेहचोरे पार्टीता दृष्टिकोण तुन अविंकु हेवसी कींदू.

कम्युनिस्ट जीवन शैली तुन माओवादी कार्यशैली तुन लागू कीता आदर्शवन कॉमरेड:

कॉमरेड सृजना तन्ना क्रांतिकारी जिंदगी लोपा बस्केने फिजूल खर्च कीतद हिले. बस्केने शोभा-शोभा मंदानद आलस्वा लेवा सीधा-साधा पिस्ता कॉमरेड आंदू. अदू एरिया कमेटी ता सचिव मतेकाई, डिवीजनल कमेटी सदस्य बनेमातेकाई उम्र बेरसनके वेने तन्ना पिस्वल ते आखरी हेवनल तन्ना तुपाई तुन अदे साफ कीता. ईगता गेत्तेंग वेने तनये सिलाई कीन्दू. पौछकु, किटकु वेने अदे सिलाई कीन्दू. किचन ते अटानीकी वेरकींग वेने तची मंजी किचन काम लोपा वेने शामिल आंदू.

1989 ते ताक्ता सेन्ट्रल मिलिटरी कैम्प तैयारिंग साटी ओसो ताना संचालन साटी कॉमरेड रामजी ना नेतृत्व ते गेरिल्ला कॉमरेड वेला मेहनत कीसि काम कीतोर. अद टीमते उदि सदस्य रूपते सृजना वेने मंजी वेले मेहनती काम कीता. अद कैम्प तुन वेले गोपनीय रूपते ताकी कीतोम. तान लोपा कैम्प तुक सामान वेने वेले गोपनीय तरिका तेने हेवसी कीतोम. मावा कॉमरेड्स 6 घंटा ताकीस मंजी सामान मत्ता जागातगा हेवसी, अगा सामान जोडपसी गाटो तिंजी डेड-दो घंटा आराम कीसि ओसो 6-7 घंटा ताकिसी वरोर-वरोर 20-25 किलो ना मूटांग तोचोरे कैम्प तुक हेविन्दूर. इद्रम लगातार 15-16 घंटांग सामान डुलाई कियला कॉमरेड्स तिप्पल आंदूर. इद्रम ता तिप्पल तुन सहन कीसोरे कॉमरेड सृजना वेला गिर्दते कैम्पता हर काम लोपा शामिल आंदू. छात्र लोरा संगे ग्राउन्ड अयटमकु करियला वेने कोशिश कीता. ओसो वेलांगे कैम्पकु ताकी कियना लोपा सृजना शामिल आसी सफल कीतद मंता.

कॉमरेड सृजना आखरी हेवनल जनता ना साटी काम कीसोरे जनता ना संगे जैविक संबंध तासि मंजी ओरकिन वेला जीवा कींदू. जनता तुन जीवा कीसोरे मतांकु ओरा सुख-दुःख ना बारे ते अणि ओरा लडाई तैयारिना बारे ते बेस पुंजी मत्ता सृजना जनता ना संगे जीवा कीसि मतांकु जनता वेने वेले विश्वासते तान जीवा कीसोरे मावा 'दीदी' इंदना हिसाबते हूडिन्दूर.

कैडरकुना संगे सुजना किन कॉमरेडली संबंधकु अणि आत्मीय संबंधकु मत्ता. जनता तुक ओसो कैडर तुक मुख्य रूपते महिला कॉमरेड्सकुन संगे सुख-दुख तुन तलकीसि पुंदना जीवा ता 'सृजना अक्का बनेमाता'.

कॉमरेड सृजना पिस्तचुक दियांग पार्टी, मिलिटरी, आर्थिक ओसो नैतिक अनुशासन तुन पालन कीसोरे आदर्शमय कम्युनिस्ट जीवनशैली तुन लागू कीता.

हत्ता 10 सालकुनल नडिय नोयना, मिंडांग नोयना, मोरकुड बूला ते गड्डा बनेमासि मंजी शारीरिक रूपते कमजोर मतेकाई बस्केने विशेष साहूलतकुना बारेते आलस्तद हिले. बचुक स्वास्थ्य समस्यांग मतेकाई जनतानगा मंजी काम कीता.

उच्च स्तर ता नेतृत्व जिम्मेदारींग लोपा कीता काम:

कॉमरेड 2009 ते रीजनल कमेटी सदस्य रूपते चुनेमासि 2015 हेवनल आंदोलन ता विकास साटी परतचुन कोशिश कीता. अद समय तेने इतेके 2013 ते एसजडसी रीजनल कमेटी सदस्यीरा संगे बना कीता एकीकृत कमांडकुना निर्माण लोपा कॉमरेड सृजना भाग आसी पश्चिम सबजोनल युनिफाईड कमांडता जिम्मेदारींग लोपा शामिल आता. डिवीजनल कमेटी सदस्य रूपते तना जिम्मेदारींग किन ताकी कीसोरेने उच्च स्तर ता कमेटी लोपा शामिल आसी मासवर्क अणि मिलिटरी वर्क तुन समन्वय कीसोरे कठिन परिस्थिति लोपा आंदोलन तुन बचा कियला कोशिश कीता. 2013 ते गडचिरोली आंदोलन सामना कीता नुकसानकुनल सबक एतसोरे एसजडसी हेवसी कीता मार्गदर्शन लोपा कमांड काम कीता.

दुश्मन ना हमलांगनल गेरिल्ला लोरिन बचा कियनीकि दावपेचकुना मूल नियमकुन लागू कियावेहचोरे मासवर्क लोपा पूना संघर्ष रूपकुन पोयसी कमांड कीता काम लोपा सृजना कीता कोशिश आंदोलन ता विकास साटी मदत आता

पार्टी नीतिंग कुन बचा कियला काम कीता कार्यकर्ता :

मावा पार्टी ता राजनीतिक-सैनिक दिशा ना बारे ते ओसो मावा पार्टी ता नीतिंग ना बारे ते सृजना किन स्पष्ट रूपते मसझदारी मत्ता. जन संघर्ष कुन लोपा, स्थानिय निर्माण कुन लोपा, पार्टी पीएलजीए ता आंतरिक पिस्वल ते मावा नीतिंग लागू कियला साटी कोशिश कीसोरे अविनु उलंघन कीतोरिन तमा आचरण तुन बदली कियना इंजोरे तन्ना राय वेहिन्दू. समस्या वीडतेके आलोचना वेने कींदू. उत्तर गडचिरोली डिवीजनल कमेटी सचिव मत्ता दिवाकर लोपा 2010 हेवनके स्वार्थ बेरसीसि गलत रूझानकु वीडसी पार्टी विरोधी काम-काजकु शुरू कीतोर. कॉमरेड सृजना 2010 ते टिप्रागड एरिया तुक प्रभारी डीवीसी रूपते हतगडल ओना आचरण तुन हूडसोरे अव पार्टी नीतिंग ना विरोध मंता इंजी समझेमाता जनता ना बारेते ए.सी लोपा चर्चा कीवा लेवये, प्रभारी डीवीसीएम संगे वेहवा लेवये व्यक्तिगत तरीकाते निर्णय कींदूर. मोर्टर साइकिल पोयसी वेलिईन्दूर. इव सबे पुता पया दिवाकर गलतिंगकुन सुधरेमायना इंजी सुझाव हीता. मति दिवाकर ना गलतिंग नगडल वेन्डवा लेवा सृजना ना प्रति भेद-भाव ते अणि दबा कियना हिसाबते व्यवहार कीतोर. मति सृजना हिम्मतते मंजी ओनु सुधरे कियला डीवीसी बैठकते आलोचना कीता. मति आखरी तुक ओना काम-काज पार्टी नियमकुना विरुद्ध मंता इंजी ओसो दुश्मन संगे संबंध मंता इंजी ओना बारे ते एस.जड.सी, सीसी सदस्य लोरकु वेहता. दिवाकर ताकी कीता पार्टी विरोध कामकुना पोरो ताकता प्लिनम लोपा पार्टी तुन बचा कियला साटी ओना पोरो अनुशासनात्मक कार्रवाई एतना इंजी मांग कीता.

2006 अक्टोबर ते ताकता डीके 4थी अधिवेशन लोपा पूना कमेटी तुन निवडेमायला साटी पेसी कीता पेनल लोपा उयतुर किन उच्छ स्तर ता कमेटी सदस्य लोरकु मंदना योग्यतांग हिलेग इंजोरे मुख्य रूपते पितृसत्ता रूझान ते मंजी नैतिक गलतिंग कीतोरिन पेनल ते तासनायो इंजी प्रतिनिधि हिसाबते स्पष्ट रूपते तना रायतुन वेहचिता राजनीतिक, सैनिक, सांगठनिक योग्यतांग मंजी नैतिक अणि सांस्कृतिक विषयकुन लोपा वेने कम्युनिस्ट मूल्यकुन पालन कीसोरे मतोरे पोरोटा कमेटी ते मंदना इंदना समझदारी ते पार्टी ता फायदा साटी कमेटी चुनाव पोरो तन्ना मतभेद तुन अधिवेशन लोपा वेहचिता. एरिया कमेटी कॉमरेड्स जनता ना नडमा अंतर विरोधकुन हल कीयनेके जन समस्यांग निवारण कीयनेके बस्के-बस्के बोना पोरो आई ओना आर्थिक स्तर तुन वीडसी दाण्ड वाटतस्के वर्ग दिशा अनुसार आर्थिक स्तर तुन वीडसी दाण्ड कीयनायो इंजी अद्रम कीतेके जनता ना लोपा मावा पोरो विरोध बेरसिता इंजी समझा कीसोरे गलतिंग सुधरा कींदू.

कसनसूर एरिया लोपा तन्ना एडमी तोर नाटेना गायता ना मरी ओना लोन वायना इंजी सुजना किन केयतोर. निम्मे एडमी आंतिन इंजी, नीवा साटी कोर एस्कतान इंजी वेहची लोन वासी गाटो तिंजी दाकिन इत्तोर. मति तन अलगे अंजी विशेष रूपते अटसी हीतद तिंजी वायनदू पार्टी पद्धति आयो इंजी वेहची तना साटी कीता कुसूर तुन दलम तेकेने तत्केने दल सदस्य सबेतोरम संगेन तिंतोम इंजी सुजना वेहतस्के ओर तेदिस हत्तोर. पया पुत्ता समाचार बातल इतेके ओर पुलिस इनफारमर आस मंजी तिंदला साटी सुजनाकु केयसी पोलिस तोरकु सौपा कीयना योजना मतप समझेमाता. बद विषय तेने आई पार्टी पद्धतिंग लागू कीयना इंदना नियम तुन पालन कीतस्के एडमी तोना जाल ते फंसेमायवा लेवा बुस्कीसि बचेमाता. इद्रम व्यक्तिगत रूपते तिंदला केयता विषय आई, जनता ना पंचकु आई, पार्टी विरोधी कबस्कुना कामकुनोरा विषयकु आई, कमेटी ता सुझाव आई बाकी बद विषय पोरो आई कॉमरेड सुजना पार्टी नीतिंग कुन बचा कीयला कोशिश कीता. पार्टी नीतिंगकुन बचा कीयला साटी अमल कीसोरे मता सुजना ना लेकटा कॉमरेड्स मतस्के, पार्टी नुकसान आयवा लेवा मुन्ने दायनीकि भरोसा मंदांता.

कॉमरेड सुजना ना आदर्शकिन लागू कीयकाल :

क्रांतिकारी आंदोलन लोपा दृढता ते मुन्ने दायकाल:

कॉमरेड सुजना ना 32 सालकुना क्रांतिकारी पिस्वल अणि आचरण सबेतोरके आदर्श अणि अनुसरणीय आंदू. ताना पिस्वल प्रेरणा लेकातद आंदू. अदू आखरी हेवनल डुल-मुल आयवा लेवा हिम्मत ते काम कीता. मतचुक दियांग जनता ना साटी काम कीयकान इंजोरे पार्टी सदस्य रूपते कीता किरिया पोरो नितीस मंजी जनता ना साटी तन्ना पिस्वल तुन समर्पित कीता. दुश्मन ना आत्मसमर्पण योजना तुन विरोध कीसोरे जनता ना साटी दृढता ते काम कीता. हमेशा दुश्मन ना हमलांग नडमा मुख्य रूपते 1993 तल 2020 हेवनल अत्ता 27 सालकु दुश्मन ना हमलांग नडमा, प्रतिकूलतांग ना नडमा, 2005 तल कारपेट सेक्यूरिटी नडमा जनता ना नडमा अंतर विरोधकुन हल कीयनेके, जन समस्यांग निवारण कीयनेके बस्के-बस्के बोना पोरो आई ओना आर्थिक स्तर तुन वीडसी दाण्ड वाटतस्के वर्ग दिशा अनुसार आर्थिक स्तर तुन वीडसी दाण्ड कीयनायो इंजी अद्रम कीतेके जनता ना लोपा मावा पोरो विरोध बेरसीता इंजी समझा कीसोरे गलतिंग सुधरा. कीसोरे मासवर्क कीता. हर साल पोलिस हमलांग, फायरिंग, मुठभेडकु आतेकाई हामुर तुक वेरियवा लेवा साहसिक गेरिल्ला रूपते जनयुद्ध हरदे काम कीता. दुश्मन ना हमलांग नगडलकु जननिर्माण देब्बा तितेके, कमजोर आतेके अविन दोगवा लेवा पुनरनिर्माणकु कीसोरे मजबूत कीतद मंता. परिस्थिति ता बदलाव अनुसार गैर कानूनी निर्माणकुना संगे कानूनी निर्माण कीसि काम किया वेहता. नवजवान लोरिन, गैर किसान तबका तोरिन जन निर्माणकुन लोपा संगठित कीसि सक्षम संगठक रूपते विकास आता. पार्टी बद काम हीतेकाई अद मासवर्क आई मिलिटरी वर्क आई, बद एरिया तुक लोहतेके आई पेरके गूचवा लेवा काम कीता. लडाई ता जरूरत अनुसार अद अहेरी तल परसवाडा बालाघाट हेवनल माड उत्तर बस्तर हेवनल अंजी काम कीता. अत्ता 10 सालकुनल नडिय नोयना मिंडांग नोयना मुरसुल बोक्काते गडडा बनेमायना, शारीरिक कमजोर मतेकाई बस्केने विशेष साहूलियत ताल्कतद हिले. अस्वस्थता कारण ते एरिया तुक अनवा लेवा मतदु हिले. हमेशा जनतान लोपा मंजी काम कीता. जनता संगे, कैंडरकुना संगे आत्मीय संबंधकु मत्ता. पार्टी नीतिंग बचा कीयला कोशिश कीता. आर्थिक रूपते फिजूल खर्च कीवा लेवा शोभा-शोभा मंदना अलास्वा लेवा साम्यवादी मूल्य कुन पालन कीसोरे सीधा-साधा पिस्ता कॉमरेड आंदू.

इंजेके सुजना भौतिक रूपते मावा नडमा हिले. मति ताना क्रांतिकारी आचरण अणि आदर्शकु मंतांग. सुजना ना शहादत तुन तेहची पोयकाल. अद कीता क्रांतिकारी आंदोलन ता निर्माण काम तुन जनतान लोपा कैंडर लोपा व्यापक रूपते प्रचार कीयकड. इंजेक वेने समाज लोपा मंता कबिलाई पितृसत्ता शोषण तुन दमन तुन सामना कीसोर मंता महिला किन सुजना लेक्का तैयार कीयकाल. कबिलाई पितृसत्ता तुक, पार्टी ते मत्ता पितृसत्ता तुक विरुद्ध लडेमायकड. ताना आदर्शकुन जनतान लोपा, कैंडर लोपा प्रचार कीसि ताना लेक्का क्रांतिकारी बना कीयकाल. ताना आदर्शकुन अनुसरण कीसोरे काम कीयकाल. इंजेटा कठिन परिस्थिति तल वेंडला साटी ताना लेक्का दोगवा लेवा दृढता ते मंजी साहसिक रूपते क्रांतिकारी आंदोलन तुन मुन्ने ओयला साटी काम कीयकड. दुश्मन ना हमला किन हरा कीयकाल. ताना आशयकुन हासिल कीयला साटी साम्राज्यवाद तुन, दलाल नौकरशाही पूंजीवाद तुन, सामंतवाद तुन मुट्टी कीसि नवजनवादी भारत तुन बना कीयकाड.

- ❖ **कॉमरेड सृजना अमर रहे!**
- ❖ **कॉमरेड सृजना ना अधूरा आशय किन हासिल कीयला साटी लडेमायकाल!**
- ❖ **नवजनवादी क्रांति जिंदाबाद!**
- ❖ **भारत ता कम्युनिस्ट पार्टी (माओवादी) जिंदाबाद.**

दिनांक : जुलाई 17, 2020

क्रांतिकारी अभिवादन ना संगे
पश्चिम सबजोनल ब्यूरो
गड़चिरोली
सी.पी.आई (माओवादी)